

Paul, Titus Ts'ó K'e Yanguz-i

Paul, Titus hadih yulhni

- 1** ¹ Si Paul Yak'usda be 'ulhna-un 'ink'ez Sizi Gri ba whel'a-un usdli. Nyoonne Yak'usda buba 'alha' yint'ohne, 'et wheni 'utahabanla. 'Ink'ez khuni 'alha' 'unt'oh-i t'ehonozin ha Yak'usda ba ndi yun k'ut uzdolts'i' ha.
- ² 'Ilhiz be ts'ukhuna-i ooka tse hoodli-i, 'i Yak'usda 'aw lhuwhusts'it 'ink'ez soo 'udechoo da' whuts'un 'i nets'u yoozi.
- ³ 'Et 'awet nts'oya whudizulh Yak'usda hukwa' ninzun-un, 'et whusahoolts'ut. 'Ink'ez ndi Yak'usda be ba yaduk-i, 'i yubunilhtan. 'Et Yak'usda, neulhyis-un, ndi khuni 'i stl'a ídan'ai.
- ⁴ Titus ndi be neba 'alha 'uhoont'oh-i, 'i gha sye' sinli'. 'I ghun nts'o k'e' usges. Yak'usda 'ink'ez neMoodihti Sizi Gri, neulhyis-un, 'en gha ye unzoo-i, be negha te' nudzun-i, 'ink'ez be nedzi dizghel-i, 'i ts'iyawh nyulh oot'e'.

Yak'usda ba 'utso whudilhdzuhlne, whuz un'a 'uhoot'e' huba' hoont'oh

- ⁵ 'Et wheni Crete 'et nenyunusti, ndi khuni ntl'a dis'ai-i, 'i be ndet lhalhodit'oh-un ts'iyawh ts'ih'un un'a lhaoodutanleh 'ink'ez lhelhdun keyoh 'oh 'utso whudilhdzuhlne 'utahabinle.
- ⁶ Dune ook'é hot'alh-un ooghu hooloh-un, 'ilhoghun za oo'at unli. Buzkeh cha buba 'alha 'uhoont'ohne hinli, 'aw nzulhuhoodil'ih, 'ink'ez khuni k'une' 'ut'enne hinle', 'et ndunt'oh-un dune oole'.
- ⁷ Dune huwunli-un unli de, 'en Yak'usda be 'ut'en k'oh-un yutl'á whulh'ai, 'et huwa ook'e hóotalhts'ulh-un whuyit oot'e'. 'Aw dich'oh duk'un'a za hukwa' noozin huba lhe'hóot'oh. 'Aw khun lhonúlhc'h'e, ts'ekoo too' cha ka dálhatni. 'Et dune 'eyaih-un cha lhiloh oole', 'ink'ez 'aw sooneya cha ha dálhatni.
- ⁸ 'Et k'us dune yoh dalih-un oole'. 'Ink'ez hoonzoo-un ts'iyawh hóont'i'. Ts'ih'un ni nizulh, 'ink'ez ts'ih'un dune unli-un cha. 'Et oodzi lubeshi ooghu hooloh whe 'ink'ez dich'oh ts'ih'un un'a khudli-un cha oole'.
- ⁹ Ndi khuni 'i be Yak'usda neba 'alha' 'unt'oh-i, nts'en'a huyodil'e', 'i ts'iyawh yotun. 'Et whe la ndi ts'ih'un un'a be whuts'odul'eh-i, 'i be

'uyoonne 'on nus budzi ulhtus hitilhtselh. 'Ink'ez cha mbene la ndi be whuts'odul'eh-i, 'i yuch'az yalhdukne, 'enne ndi khuni 'i be ninta' hut'ih-un 'et whubuntilhtun.

'Utso whudilhduhne bube 'ut'en

10 Tube lhane ndi khuni hik'úne' tit'en hukwa lhe'hunizun 'ink'ez 'ants'i lahóot'oh te nuyahalhduk. 'Ink'ez 'uyoonne nahuna'a, butoh Lizwif unline, 'enne 'uk'enus hintsi'.

11 Ndunt'ohne yahalhduk-un whuch'a bontayulh. Ndut'enne 'enne tank'us un'a dune huhodulh'eh. 'Et 'i be 'uyoonne dune duyoh dilhts'ine ninta' buhulh'ih. 'Enne huduzoh hukw'un'a bughá' tizulh 'et wheni 'uhutni.

12 'Et Crete whut'enne butoh, 'ilhoghun dune nus hoo'en-un 'en 'utni, "Crete whut'enne 'ahoolhyiz howhuts'it, khuna-i untsi'-i nduhult'oh, tsehudutni cha' 'uhint'oh, 'ink'ez bucha hooncha cha' hinli."

13 'Et daja ubúlhni-un, 'alha' 'uhutni. 'Et huwa tube cho hukwa' budini. 'Et de sih be neba 'alha' 'uhoont'oh-i, 'i be 'on nus hilhtus oole'.

14 Lizwif be 'udada' 'aw buba 'alha' lhe'yóoste'. 'Ink'ez ndunne khuni 'alha' 'unt'oh-i ch'az nálhyane, 'enne bughuni uboozólh'ts'ai' junih.

15 'Et mbene la buyo ts'e lhoditsunne, 'enne hoonli buba me lhiloh. 'Et hoonts'i mbene la budzi dutsun suli'ne, 'ink'ez buba 'alha' lhe'hóot'ohne, ts'iyai buba me yinli. 'Ink'ez bubeni 'ink'ez buyo ts'e 'i gha t'ets'oninzun-i, 'i ts'iyai dutsun whe 'unt'oh.

16 Ndunt'ohne, "Yak'usda t'eznínzun," hutni, 'et hoonts'i dude 'ut'en be hich'az ditni. 'Enne buts'u hoonts'i'ne hinli, 'ink'ez dich'oh k'une' hutit'en-un 'et za hukwa' huninzun. 'Et 'ut'en unzoo-i 'uhutilh'elh-un, 'aw huba soo lhe'hildzoo' whe' hint'oh.

Yak'usda ba 'ilhunaoodulhne bube 'ut'en k'oh

2 1 'Et hoonts'i Titus ndi ts'ih'un un'a be whuts'odul'eh-i, 'et za bududóni'.

2 Ndunne yoo 'un uzulhne dune, talhonoosnai' huba' hoont'oh, te'hunoolhdzin, 'ink'ez ts'ih'un ni hunidoh. Whuduts'o whe buba 'alha' hot'e'. Be lhk'e ts'utsi'-i 'ink'ez 'aw hoonli talhohodinine, 'et whuz un'a 'úhoot'e'.

3 Ts'ekoo yoo 'un uzulhne, 'enne cha whuz un'a 'uhoot'e'. 'Enne teni' nilhdzunne hoole'. 'Uyoonne hoonts'i' k'un'a bughu yalhuoolhduk. Ts'ekoo too' ghu dalháhatni. 'Ink'ez hoonzoo-un za 'uyoonne huhodoolh'eh.

4 'Et cha t'edukoo dukike 'ink'ez duduzkehke cha buk'e hoontsi', whuz un'a bugha hudooni'.

5 Ts'ih'un ni hunidoh, Yak'usda ba 'udun nebuninlane hutileh. Duyoh cha ts'ih'un un'a howu hinli, hoozoo', 'ink'ez dukike buk'une' hoot'en. 'Et de la 'uyoonne 'aw Yak'usda ooghuni ch'az yahoolhduk ait'oh.

6 'Et chilke online, 'enne cha ts'ih'un ninidohne hoole'.

7 'Ink'ez Titus nyun cha ts'iyantsuk whe nga 'ut'en unzoo-i 'uhoolh'en, whuz un'a 'ont'e'. 'Et ndi be whuts'odul'eh-i, 'i ts'iyawh 'aw lhdoosun, dólhti', 'ink'ez 'aw hoonliyaz whe 'ats'un un'a oot'e' junih.

8 Khuni duts'o-i ooba nahoodeh ait'oh-i, 'et nch'az ditni-un yooya oole'. 'Aw khuni ntsi-i be nghu yaooduk ait'oh.

9 'Ulhane 'enne cha dumoodihne buk'une' hoot'en budini. Budzi hóolhdzoo' 'oh te za ne'hoot'en. 'Ink'ez 'aw budulhyoh cha lhe'hudoosnih.

10 'Ink'ez 'aw bughu lhe'hundunoost'i. K'us dumoodihne ts'un ts'ih'un un'a 'uhoot'e', hoonzoo k'un'a whúbunilhtun-un 'et la whut'az 'uhoot'e'. 'Et de la Yak'usda neulhyis-un, ooghuni be whuts'odul'eh-i ts'iyantsuk whe 'on nus unzoo oole'.

Yak'usda ye unzoo-i, 'i ts'iyanne nalhts'et ha hoolts'ut

11 'Et Yak'usda ye unzoo-i be uzdujih-i, 'i ts'iyanne nalhts'et ha hoolts'ut.

12 'Et whuneoodulh'eh, ndet Yak'usda be 'ut'en lhuholoh-un, 'ink'ez whenich'oh ndi yun k'ut hukwa' 'uzninzun-un, 'et ts'iyawh dah 'uzdooni'. 'Et k'us ts'ih'un ni uznizulh-un, ts'ih'un dune tsinli-i, 'i cha, 'ink'ez Yak'usda ts'un teni' uznilhdzun k'oh ts'e za ts'oot'e', 'andit whuz un'a za 'uts'oot'e',

13 'et neYak'usda 'uk'enus dizti'-un, 'ink'ez Sizi Gri neulhyis-un, oots'u ha yánduz-i, 'et nenalhts'et ha óotilts'ulh whuts'un, ndi 'uk'enus hoonzoo-un huba ts'ilh'i.

14 Sizi Gri neba huwa' dudulti nelubeshi ch'a nenaootakulh ha. 'Ink'ez wheni dich'oh oodune'ne dune 'ut'en unzoo-i za 'uts'oolh'en.

15 Titus ndúhoont'oh-un huwun bubulh yailhduk, buba nus whunilht'i, 'ink'ez mba' hoot'oh, 'et huwa whe nínta' hut'ih-un hukwa' budini. Dune 'ants'i buba 'onle' junih.

Ye unzoo-i be ndi yun k'ut uzdilhts'i-un

3 1 'Et nyoonne Crete whut'enne bula 'ineh njan huwu ni hotan ha. Ndunne keyoh huwunline 'ink'ez bumoodih online, 'enne buk'une' hoot'en. 'Ahoohyiz 'ut'en unzoo-i, 'uhutilh'elh wheni lhahúdoot'e'.

² 'Uyoonne hoontsi' k'un'a bughu yahoolhduk junih, 'ink'ez 'aw lhdulhyoh 'uhudootni' junih. K'us ts'iyanne nalhtsulyaz né'boohoolh'en 'ink'ez 'uyoonne ts'un yo 'úhududoldzin.

³ Wheni cha whuz un'a za ts'uwhusni ínle!. Khuni k'u nulhe'ts'ust'en. Naznut'ah. Lhelhdun ts'uhóont'i' whe hoontsi' te ne'ts'ust'en. Ts'intsi' whe ndi yun k'ut 'uzdálts'i', 'ink'ez 'oonih bulh cha' 'uts'ant'e'. 'Uyoonne ts'uzdutni 'ink'ez ts'iyawh lhts'uzdutni.

⁴ 'Et hoontsi' 'oh da' 'uja neYak'usda neulhyis-un, 'en nets'un yé nek'entsi'-i 'ink'ez yé nets'un unzoo-i 'i bulh, 'i ts'iyanne nalh be hóodiltsai, 'et whe uzdijiz,

⁵ ts'ih'un un'a 'uts'it'en-un ínle!, 'aw 'et huwa íloh uzdijiz. 'Et hoontsi' ye te' ninzun-i gha, 'i be neúlhyih. 'Et 'ants'i tunáts'usguz 'et whe doo cha za ts'uwhuzdli, 'ink'ez Ndoni be 'andit-un nats'usdli',

⁶ 'ink'ez Yak'usda nets'un oola hoonli whe Ndoni nets'itilh'a'. Sizi Gri neulhyis-un, 'en be 'uja,

⁷ 'et whe ye unzoo-i gha nelubeshi ts'iyawh neba hooloh yulhtsi. 'Ilhiz be ts'ukhuna-i hukwa tse hoodli-un, 'et nech'e' whutaleh 'et huwa.

⁸ Ndi khuni 'alha' 'unt'oh-i 'unt'oh. 'Ink'ez 'ahoolhyiz 'et za ndudóni' nts'u hukwa' nuszun. Mbene Yak'usda ooba 'alha' yint'ohne, huwu hinli whe 'ut'en unzoo-i za 'ahoolhyiz higha oona'. Ndi khuni ts'iyanne ba unzoo 'ink'ez dune whe soo' hutit'elh.

Lhdulhyoh 'udoohni' junih

⁹ 'Et hoontsi' Moses ooghuni 'uk'u neyuzguz-i ghun, whusni khuni cha, 'ink'ez lhenyoone whutsoda'ne huye yailhduk-i, 'i cha, 'ink'ez lhdulhyoh 'uhudutni, 'et ts'iyawh ooch'oh 'ont'e'. 'Aw ts'iyanne ba lhe'hoozoo' 'ink'ez 'ants'i hoonli whe' hoont'oh.

¹⁰ Mbe dune lhch'az nilht'i-un, 'et whulh nat-un dah dáni' de, 'ink'ez 'aw lhunyudústs'o de, teneóolh'a'.

¹¹ T'eeonínzun ndunt'oh-un dune 'en dudeni be tank'us úninzun 'ink'ez lubeshi 'ulh'en-un 'et za hoont'i'. 'Et huwa 'i be dich'oh ninta' dudulti whe 'unt'oh.

'Udek'ez khuni yé bubulh yánalduk

¹² 'Et Artemas k'us Tychicus 'ilhoghun nts'u tís'alh de, 'et 'aho diz tonya', njan keyoh Nicopolis ts'uwhútni-un. 'Et khit wheni njan tisdalh-un lhaóodusdla 'et huwa.

¹³ 'Et Zenas dune ba yalhduk-un 'ink'ez Apollos, 'enne khun nk'uhun'as de, di la hika' ninzun-i, 'i butl'a yónlelh, 'a cho hutoo'as. 'Ink'ez khun hoonli 'e hundunóts'it junih.

14 'Ink'ez nets'u ditnine, t'ehonoozeh 'ut'en unzoo-i za 'uhoolh'en. 'Uyoonne hiye ndunidzit-i huye búla' hoot'en. 'Et sih ndi yun k'ut 'ants'i 'et lhodólhts'i.

Ye unzoo-i nohbulh óot'e'

15 Mbene la szih dilhts'ine, 'enne hadih nyuhútni. Mbene la ooba 'alha 'uhoont'ohne nek'entsi'ne, 'enne cha ts'iyawh neba hadih budíni. 'Et Yak'usda ye unzoo-i nohni ts'iyawh nohbulh oot'e'. 'Et ndo honeh.